

## Słowa dźaka a připóznaća

### Smjerdžečanska wohnjowa wobora 60lětnje wobstaće swjećiła

**Smjerdźaca** (aha/SN). Po tym zo bu Łazk do Smjerdźaceje zagmejnowany, bydleše tam něhdźe 260 ludźi. A po zakonju dyrbjachu gmejny z wjac hač 200 wobydlerjemi dobrowólnu wohnjowu woboru měć. Tak je k tomu dóšlo, zo w Smjerdźacej 1957 tajku založichu. Lěto po tym natarichu gratownju, kaž ju džensa hišće maja. Minjeny kónc tydženja zhladowachu kameradojo na swoje 60lětnje wobstaće z třidnjowskim swjedženjom.

Přeni nawoda wobory bě Pawoł Kušk a po nim steješe štyri lětdzesatki Pětr Ra-

chel na čole woborneho cyłka. Mjeztym stara so wo wotpowědne wukublanje a stajnu zasadźensku hotowosć kameradow Norbert Róbl, kiž bě tež z wotběhom a wothłosom na jubilejny swjedzeń pře- wšo spokojom.

Hižo k zazběhej pjatk wječor knježeše dobra nalada, jako hrjachu wólne zestajane mustwa tři hodźiny pospochi ludowy bul. Sobotu wubědźowaše so šesć cyłkow we volleyballu. Domjacy Bad Boys wopokazachu so při wysokim saku před Dwójnej nulu z Pančic-Kukowa a teamom

Fit for fun z Kamjenca jako najlěpši. Njedzelu popołdnu nastupi džewjeć mustwow kaž tež młodźinske zastupnistwo gmejny Ralbicy-Róžant na arealu „stadiona při dziwjej rěčce“ k wubědźowanju w hašenju. Norbert Róbl bě jara zbožowny, zo wobsadźichu jeho kameradojo před wobornikami z Konjec-Šunowa a Róžanta-Sernjan přenje městno. Moderatoraj wubědźowanja Gerhard Šořta z Brěžkow a Helmut Libs, hač do 2002 zastupowacy hašenski mišter tehdyšeho Kamjenskeho wokrjesa, powědašaj přihladowarjam wjele zajimawych faktow wo džěle kóždje nastupjeneje wobory.

Čestnaj hosćej swjedženja, zapósłanča zwjazkoweho sejma Marja Michałkowa (CDU) a wjesnjanosta gmejny Ralbicy-Róžant Hubertus Ryčer (CDU), chwalešaj sej dobru organizaciju wubědźowanja. Wonaj dźakowašaj so wobornikam a zwuzraznišaj připóznaće wosebje tež Pětrej Jeńce, kiž je wot časa založenja wobory stajnje spuščómny člon, kaž tež wjelelětnemu nawodźe Pětrej Rachelej.

Wjele zabawy skičachu džěcom. Wosebitostka za nje bě, zo móžachu na štyrjoch městnach pod dohledom wohnjowych wobornikow z originalnej sykawu wodu pryskać. Mjeztym sedmy raz přewjedzachu napřemopřuwanje gumijowych kačkow na Smjerdžečanskej wodze. Z 75 kačkow běštej pola džěci ta Leny Kühnec, pola dorosćenych pak kačka Koblíčanskich wobornikow najspěšnišej.



Smjerdžečanska wohnjowa wobora je sej njedzelu w hašenskim wubědźowanju přenje městno zawěšćiła. K tomu gratulowachu tež čestni hosćo. Foto: Alfons Handrik